

湖海樓全集



湖海樓詩集

光緒壬辰仲秋
弇山鐸署重刊

詩原序

詩雖所以吟咏性情然亦可以攷其邑居氏族與其家
世之盛衰君臣交際之離合而人之一身有先榮後悴
有始困終亨歷時不同則其性情之可見亦各異焉予
歷觀前世詩人自建安王劉輩遭漢季失馭羈旅無聊
有惄焉憂生之感下逮江左分裂之際衣冠失職往往
播遷爲羈囚唐自乾寧光化以後則一時能文之士操
其鉛槧以外依方鎮於幕下者舉足皆是其間強弱吞
併出彼入此曾不容瞬士生其間譬如墜秋風之籜於
狂波萬折之中展轉盤渦而不可止此其可悲者也嗟

夫自予之讀陳子其年之詩識其所遇以想見其爲人而及今之邂逅於江南之逆旅也已十五六年矣其年生長江南繁富之地方其少時視家族鼎盛鮮裘怒馬馳騁於五陵豪貴之間狂歌將軍之筵上醉臥胡姬之酒肆其意氣之盛可謂無前故其詩亦雄麗宕逸稱其胸中及長遇四方多故殘烽敗壘驚心動魄之變日接於耳目而向時笙歌促席之處或不免蹂爲荆棘以棲冷風故其詩亦一變而慷慨激昂有所愴然而悲愴然以思以時入於少陵沉鬱之態而不自覺亦其遭時之變以然也其年起謂予曰余所哀輯自十六七歲時更

今幾二十餘年然後得詩凡若干首然則其年之性情見於此矣予特取其命詩之意所謂湖海樓者思之知其意不在詩將無大拯橫流宏濟時艱者其人耶旣而又思前代之人其遭時不幸至於顛隳失所及天下始平干戈不用而文士出而斯人者已窮困以老或死不及見矣豈非其命與然陳子則年始強立精力方銳使其目擊太平以咏歌一代之盛吾知又將變其慷慨激昂者比之朱絃疎越以奏清廟而肅鬼神而出於前代詩人之所不及則此猶其未成之書也世常謂詩人少達而多窮其非今之謂哉慈谿姜宸英

予閱弇州集至文人九命之說未嘗不三歎也卽以有
明一代論之其富貴壽考而享大名者惟弇州與西涯
耳他若楊升庵康對山狀元及第而逐死滇南汧東間
李崆峒下獄湯若士罷官李滄溟無後何大復徐昌穀
宗子相皆早歿至如唐伯虎盧次楨徐文長輩無不坎
壈終其身而當時公卿大夫委瑣齷齪以取功名問其
姓氏湮沒無聞者車載斗量不可勝數也試與造物者
衡之豈其重在此其輕在彼哉語云予其角者去其齒
附以翼者足兩趾天旣予斯人以才矣則必靳其富貴
減其壽考以示盈虛之理缺陷當然是人固無如天何

也然斯人者又不肯稍貶其才以求富貴壽考而必飛揚跋扈以與天爭乃其著作窮而益工沒而益顯是造物者能厄其百年而不能奪其千秋萬歲之名天亦無如人何也嗚呼吾於吾友陳子其年而知其然也陳子生於高門自其少時卽以文章縱衡忝世然屢困場屋至爲有司所唾棄及垂暮之年

天子迺以博學鴻詞召入翰林橐筆史館僅三載餘卒以家貧不能謀食又遭婦亡哀怨傷懷鬱鬱成疾以死死而無子嗣其姪以喪還一棺束身萬事都已悲夫今友人輯其遺稿有詩若干首夫古之詩人至李杜止矣

然二子皆不第李以賀知章薦供奉翰林杜獻三大禮
賦赴行在授拾遺幸已終不免於夜郎之流嶽廟之餓
世其惜之然其遭際比之浩然放廢長吉短命已爲愈
矣至於筆精墨妙獨步橫行雖二十四考之中書百三
十六歲之遺老不能得其隻字若以陳子生平本末與
之較長絜短彷彿似之千載而下讀其詩感其遇雖與
李杜齊名可也向使陳子丁年上第積祿以至大官長
子孫登高年不過長安道上一白頭公而已惡能揚光
蜚聲立言以垂不朽哉由此觀之所謂天道是耶非耶
蓋在此不在彼也長洲尤侗

伯兄爲詩凡三變自齟齬時卽隨先大人後聆諸先生緒論究心風雅少從陳黃門吳祭酒游故其詩流麗風華多沿六朝初唐之習以後浪跡燕豫所爲詩得於車塵馬足之次者爲多沈鬱悲愴而詩一變晚與輦下諸公上下議論蒼辣奔放多學少陵昌黎東坡放翁而詩又一變凡每變而愈上伯兄臨終時自云吾詩在唐宋元明之間不拘一格所謂得失寸心知者歟如臯諸君曾爲刻湖海樓稿并刻射雉集於維揚爲阮亭先生手定數年後伯兄詩益進又悔從前之刻有未當取射雉集重加刪訂次第編年斷自辛丑及於壬子癸丑至丁

已則肆力於填詞詩不多作戊午後就徵京師官禁近
詩益工至壬戌捐館搜其遺集皆伯兄手錄成帙多巨
公名家所丹鉛者以伯兄之才晚歲始拜一官而又不
祿心竊慟之念其生平心力盡於此不忍聽其散佚爰
並付梓以備

當代大君子論定焉刻成畧敘其梗概如此弟宗石

先大人檢討公詩自順治十八年辛丑至康熙二十一
年壬戌農部四叔父已付梓與古文詞彙成一集辛丑
以前十餘年詩向刻於如臯冒巢民先生家今板不知
歸於何處曾記卷首有雲間蔣大鴻先生序文又有先

生蠅頭細楷朱評云憶昔陳黃門先生語余自嘉靖七
子以來詩家各體變態畧盡獨七言長篇尙多境地將
來才人差足自展竊以望之子輩予謹識斯言而功力
才分若或限之愧無以繼曩哲之遺響今果得之其年
因追三十年來議論標之簡端借吾友之有餘補予情
所未慊所謂如其意之所欲出古人之言良爲不欺亦
以見詩流鼓吹自成風會其年得之三十年以後先生
預發之三十年之前洵乎大雅之宗有先覺也又云七
言古至此直是有裨實用長篇奔放絡繹頓挫淋漓一
往百折千迴引入勝不知當日揮毫落紙時何以牽

情惹恨一至於此前賢緒論恐久而失傳因并識之至
各體之沈浸於漢魏三唐兼工並擅自有諸名家論次
不復贅云男履端謹識

湖海樓詩集目錄

宜興陳維崧其年著 邑後學任光奇重校

卷一

五言古詩五十首

卷二

五言古詩六十七首

卷三

五言古詩四十三首

卷四

七言古詩四十八首

卷五

七言古詩五十首

卷六

七言古詩六十四首

卷七

七言古詩四十四首

卷八

五言律詩一百三十八首

卷九

七言律詩一百三十一首

卷十

七言律詩一百二十五首

卷十一

五言排律十三首

七言排律二首

卷十二

五言絕句十八首

七言絕句二百九首

上卷詩二百八首

下卷詩一百八首

上卷詩一百八首

下卷詩一百八首

上卷詩一百二十首

下卷詩一百二十首